

MESYUARAT KEDUA, PENGGAL KETIGA
PARLIMEN KEEMPAT BELAS
2020

HARI RABU : 12 OGOS 2020

JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 2, 12 HINGGA NO. 49)

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE EMPAT BELAS**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 12 OGOS 2020 (RABU)

SOALAN

Minta **MENTERI PERTANIAN DAN INDUSTRI MAKANAN** menyatakan:

- (a) apakah usaha pembangunan yang telah dilaksanakan ke atas tanah-tanah terbiar yang banyak di daerah Papar dan berapa jumlah yang telah dibelanjakan setakat ini dari Mei 2018 untuk pembangunan di P.175; dan
- (b) kenapa LKIM telah mengeluarkan polisi untuk mengharamkan pengeksporan ikan dan udang keluar negara, ini tidak adil kepada negeri yang mempunyai hasil laut yang banyak seperti Sabah.

JAWAPAN

Tuan Yang di-Pertua,

a) Tanah Terbiar

1. Usaha pembangunan yang telah dilaksanakan ke atas tanah-tanah terbiar di daerah Papar adalah melalui Projek Pemulihan Tanah Sawah Terbiar yang telah dilaksanakan bermula pada tahun 2007. Projek ini khusus bagi tanah sawah untuk tujuan penanaman padi dan menawarkan insentif kepada usahawan dan pemilik tanah pada kadar maksimum RM5,000 – RM7,000 per hektar secara one-off bagi komponen penyediaan tanah seperti pembukaan kawasan dan pembajakan sawah serta pemberian *benih high-yielding variety* (HYV) secara percuma, pemberian input baja dan racun serta peralatan ladang.

2. Melalui projek ini, setiap peserta diwajibkan mengusahakan selama lima (5) musim penanaman. Peserta juga layak menerima semua jenis bantuan penanaman padi seperti subsidi pembajakan sawah, insentif baja dan racun dan subsidi jualan harga padi setelah mereka mengusahakan semula sawah berkenaan.

3. Sehingga kini, Projek Pemulihan Tanah Sawah Terbiar yang dilaksanakan di Papar dari Mei 2018 telah menerima peruntukan berjumlah RM792,500.00 yang melibatkan tanah berkeluasan 130 hektar dan 127 orang peserta. Maklumat terperinci Projek Pemulihan Tanah Sawah Terbiar adalah seperti di Jadual berikut :

Tahun	Lokasi	Keluasan/Petani	Peruntukan Disalurkan (RM)
2018	-	-	Tiada
2019	Kg. Novoung Kg. Luagan, Bongawan	30 hektar / 39 orang 40 hektar / 33 orang	181,000.00 242,500.00
2020*	Kg. Novoung Kg. Sabang, Bongawan	35 hektar /38 orang 25 hektar / 17 orang	210,250.00 158,750.00

*sasaran 2020

NO. SOALAN : 2

Pembahagian peruntukan ke daerah - daerah termasuk Papar sepanjang pelaksanaan program, adalah ditentukan oleh Jabatan Pertanian Sabah.

b) Pengharaman pengeksportan ikan dan udang keluar negara

4. LKIM **tidak mengharamkan eksport** tetapi melaksanakan **Sekatan Eksport Bagi Beberapa Spesis Ikan Terpilih** bagi musim-musim tertentu iaitu pada pra dan pasca perayaan serta musim tengkujuh.

5. Perlaksanaan sekatan eksport ini bertujuan untuk memastikan bekalan ikan yang mencukupi bagi rakyat tempatan pada harga yang berpatutan sepanjang perayaan serta menjamin bekalan stok ikan dalam negara mencukupi ekoran daripada permintaan yang tinggi pada musim perayaan seterusnya ia dapat meningkatkan bekalan makanan dalam negara mencukupi pada musim tersebut.

6. Setiap tahun, sekatan eksport ikan dilaksanakan selama 4 bulan seperti berikut:-

- i) 2 bulan sepanjang Tahun Baru.
- ii) 2 bulan sempena Bulan Puasa dan Hari Raya Aidilfitri.

7. Spesis ikan yang dilarang untuk dieksport adalah ditetapkan oleh Jawatankuasa Teknikal Pentadbir Kebenaran Import dan Eksport Hasil-hasil Perikanan yang terdiri beberapa agensi dan jabatan seperti LKIM, MAQIS dan FAMA. Keputusan mesyuarat ini dibentangkan di dalam Mesyuarat Jawatankuasa Kawalan Import Eksport Keluaran Pertanian Kementerian Pertanian dan Industri Asas Tani untuk kelulusan.

8. Kriteria spesis ikan yang disekat semasa musim Perayaan adalah merangkumi spesis yang mendapat **permintaan yang tinggi dari rakyat tempatan** seperti ikan **kembung, selar, selayang/ sardin, pelaling, bawal dan udang (tangkapan)**.

9. Kemasukan ikan dari Semenanjung ke Sabah dan Sarawak atau sebaliknya adalah tidak ditakrifkan sebagai aktiviti import dan eksport

NO. SOALAN : 2

mengikut tafsiran dalam Kaedah 2, Kaedah-kaedah Pemasaran Ikan 2010, Lembaga Kemajuan Ikan Malaysia iaitu :

- a. “Eksport” ertinya membawa keluar atau menyebabkan dibawa keluar apa-apa ikan dari Malaysia.
- b. “Import” ertinya membawa masuk atau menyebabkan dibawa masuk apa-apa ikan ke dalam Malaysia.

10. Sekatan yang telah dilaksanakan pada tahun ini adalah pada 1 Januari 2020 sehingga 28 Februari 2020 telah dilaksanakan bagi Perayaan Tahun Baru Cina. Namun demikian, sekatan pada bulan Puasa & Perayaan Hari Raya Aidilfitri yang dijadualkan pada 15 April 2020 sehingga 15 Jun 2020 telah ditarik balik berikutan dari wabak COVID-19 dan Perintah Kawalan Pergerakan (PKP) yang telah bermula pada 18 Mac 2020.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN NIK NAZMI BIN NIK AHMAD
[SETIAWANGSA]**

TARIKH : 12 OGOS 2020

SOALAN

TUAN NIK NAZMI BIN NIK AHMAD [SETIAWANGSA] minta **MENTERI
PENGAJIAN TINGGI** menyatakan :-

- (a) berapa bilangan graduan Ijazah Sarjana Muda Pendidikan universiti Awam yang belum mendapat penempatan selepas tamat belajar sekurang-kurangnya setahun ; dan
- (b) apakah langkah-langkah yang diambil bagi membela nasib graduan-graduan ini.

JAWAPAN

Tuan Yang di-Pertua,

Kajian Pengesanan Graduan yang dilaksanakan oleh Kementerian Pengajian Tinggi, pada tahun 2019, mendapati bilangan graduan warganegara Ijazah Sarjana Muda Pendidikan di Universiti Awam pada tahun 2019 yang belum mendapat penempatan dalam tempoh enam bulan selepas menamatkan pengajian adalah berjumlah 598 orang iaitu 17.5 peratus daripada keseluruhan 3,456 graduan Ijazah Sarjana Muda Pendidikan di universiti awam pada tahun tersebut.

Bagi membantu graduan-graduan ini, kementerian telah melaksanakan tiga (3) strategi iaitu melaksanakan program, dengan izin

reskilling dan *upskilling*; membuat padanan pekerjaan; dan memberikan latihan dan bimbingan keusahawanan.

Melalui pelaksanaan program *reskilling* dan *upskilling*, graduan termasuk di bidang pendidikan akan diberikan pengetahuan dan kemahiran tambahan sama ada melalui persijilan kemahiran mahupun persijilan profesional untuk meningkatkan kebolehpasaran mereka. Bidang-bidang latihan yang diberi fokus adalah seperti *e-Commerce*; *robotic engineering*; *Internet of Things (IoT)*; *Artificial Intelligence (AI)* serta pengurusan dan kejuruteraan data. Program-program ini dilaksanakan secara kolaborasi strategik dengan pelbagai agensi seperti HRDF; MDEC; PUNB, SME Bank, CEDAR dan sebagainya.

Universiti Pendidikan Sultan Idris (UPSI) juga misalnya, sedang merangka kerjasama dengan badan antarabangsa seperti UNESCO dan Consortium of Asia Pacific Education University (CAPEU) untuk melaksanakan program latihan mengajar dan penempatan graduan di sekolah dan kolej di negara ASEAN dan Asia Pasifik. Melalui kerjasama ini skop pasaran pekerjaan kepada graduan dapat diperluaskan. Selain itu, UPSI juga turut melaksanakan program padanan pekerjaan kepada graduan ini melalui penempatan di sekolah dan kolej antarabangsa atau swasta di dalam negara.

Tumpuan turut diberikan oleh Kementerian untuk meningkatkan penerapan nilai keusahawanan kepada graduan di bidang pendidikan bagi menggalakkan mereka bekerja sendiri dan mampu berdaya tahan dalam jangka masa panjang. Melalui pelaksanaan inisiatif *Job Creator Framework* di bawah Lonjakan Satu (1), Pelan Pembangunan Pendidikan Malaysia 2015-2025 bagi Pendidikan Tinggi, pelajar diterapkan nilai dan kemahiran keusahawanan untuk menganjakkan minda mereka daripada hanya sebagai pencari kerja (*job seeker*) kepada pencipta kerja (*job creator*). Dalam konteks ini, graduan di bidang pendidikan yang belum mendapat penempatan dan berminat untuk membuka Taman Asuhan Kanak-kanak (TASKA); Taman Didikan Kanak-kanak (TADIKA); Pusat Tuisyen dan sebagainya yang bersesuaian dengan kemahiran yang mereka miliki akan diberikan latihan dan bimbingan keusahawanan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI JALALUDDIN BIN HAJI ALIAS
[JELEBU]**

TARIKH : 12 OGOS 2020 (RABU)

SOALAN

Minta **MENTERI PENGAJIAN TINGGI** menyatakan apakah hasil dapatan yang telah dikeluarkan oleh Jawatankuasa yang ditubuhkan bagi mengkaji modul baru untuk pelaksanaan Perbadanan Tabung Pendidikan Tinggi Negara (PTPTN).

JAWAPAN

Tuan Yang di-Pertua,

Atas keprihatinan kerajaan untuk mengurangkan bebanan yang ditanggung oleh peminjam PTPTN di samping memastikan kelestarian kewangan Tabung Pendidikan PTPTN, satu pasukan Panel Penasihat Khas yang terdiri daripada pakar-pakar berpengalaman daripada industri berkaitan telah dilantik untuk melaksanakan Konsultasi Rakyat, seterusnya menyelaraskan dan menyediakan laporan berdasarkan cadangan-cadangan yang diterima.

Bagi mendapatkan maklum balas berhubung perkara ini daripada pihak-pihak berkepentingan, Konsultasi Rakyat telah dilaksanakan bermula 16 Mei hingga 13 Jun 2019. Antara dapatan daripada Konsultasi Rakyat tersebut adalah:

- i. Penangguhan bayaran balik diberikan kepada peminjam yang berpendapatan kurang daripada jumlah pendapatan bulanan tertentu yang ditetapkan oleh PTPTN;
- ii. Kaedah bayaran balik sedia ada digantikan dengan Skim Bayaran Balik Berasaskan Pendapatan atau *Income Based Repayment (IBR)* untuk peminjam baharu;
- iii. Pelaksanaan bayaran balik melalui kaedah potongan gaji secara mandatori;
- iv. Penguatkuasaan yang lebih tegas terhadap peminjam ingkar;
- v. Pelaksanaan Sistem Penjamin;
- vi. Pemansuhan Dasar Pengecualian Bayaran Balik Bagi Graduan Kelas Pertama atau digantikan dengan Pengecualian Separa; dan

- vii. Pengurangan jumlah pinjaman dan secara beransur-ansur menamatkan pinjaman kepada Institusi Pendidikan Tinggi Swasta (IPTS) serta kursus-kursus yang berprestasi rendah.

Setelah mengambil kira dapatan daripada Konsultasi Rakyat tersebut, Panel Penasihat Khas telah menasihat dan mengesyorkan Lembaga Pengurusan PTPTN mengenai penambahbaikan mekanisme bayaran balik pinjaman yang seterusnya dibentangkan sebagai Cadangan Mekanisme Baharu Bayaran Balik Pinjaman kepada Kerajaan.

Mengambil kira situasi ekonomi serta kedudukan kewangan semasa, Kerajaan berpandangan bahawa pelaksanaan cadangan Mekanisme Baharu Bayaran Balik Pinjaman PTPTN belum sesuai untuk dilaksanakan dengan mengambil kira jumlah bayaran balik berbanding jumlah pinjaman yang masih belum berbayar.

Kaedah Potongan Gaji Berjadual (PGB) mengikut kadar ansuran bulanan sedia ada dikenal pasti sebagai kaedah lebih sesuai untuk dilaksanakan bagi memastikan proses kutipan bayaran balik PTPTN yang lebih mudah dan efisien. Walau bagaimanapun, kerajaan akan sentiasa mengenal pasti pendekatan terbaik bagi bayaran balik pinjaman yang tidak membebankan peminjam dan dalam masa yang sama kepentingan PTPTN terpelihara.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN SYED SADDIQ BIN SYED
ABDUL RAHMAN [MUAR]**

TARIKH : 12 OGOS 2020 (RABU)

SOALAN

TUAN SYED SADDIQ BIN SYED ABDUL RAHMAN [MUAR] minta **MENTERI KOMUNIKASI DAN MULTIMEDIA** menyatakan rancangan bagi memastikan internet jalur lebar di negeri Sabah, Sarawak dan kawasan-kawasan di luar bandar besar seperti di Muar dapat dipertingkatkan bagi menjamin kemudahan pendidikan dan perniagaan, sekali gus dapat merancakkan pelaburan di sesebuah tempat.

JAWAPAN

Tuan Yang di-Pertua,

1. Untuk makluman Ahli Yang Berhormat, pihak Kementerian melalui Suruhanjaya Komunikasi dan Multimedia Malaysia (SKMM) telah dan sentiasa memberi tumpuan kepada penambahbaikan infrastruktur komunikasi melalui penyediaan liputan jalur lebar berkelajuan tinggi dengan menggunakan pelbagai teknologi untuk membolehkan rakyat terutama di Sabah dan Sarawak menikmati akses kepada perkhidmatan jalur lebar berkelajuan tinggi yang lebih menyeluruh.

2. Antara inisiatif-inisiatif penyediaan perkhidmatan jalur lebar di Sabah adalah seperti berikut:-

- a. sebanyak 65 menara baharu yang sedang dalam peringkat pelaksanaan bagi penyediaan perkhidmatan jalur lebar mudah alih 3G dan 4G. Kesemua menara ini dijangka siap dan beroperasi sepenuhnya secara berperingkat bermula suku pertama 2021; dan
- b. sebanyak 43,879 pelanggan di Sabah akan dinaiktaraf dari perkhidmatan rangkaian berasaskan tembaga kepada rangkaian gentian optik. Inisiatif yang akan dilaksanakan oleh Telekom Malaysia Berhad ini dijangka akan siap secara berperingkat menjelang akhir tahun 2021. Jumlah ini dijangka akan diselaraskan dari semasa ke semasa disebabkan oleh faktor peralihan langganan pelanggan.

3. Bagi Sarawak pula, antara inisiatif-inisiatif penyediaan perkhidmatan jalur lebar adalah seperti berikut:-

- a. sebanyak 31 menara baharu yang sedang dalam peringkat pelaksanaan bagi penyediaan perkhidmatan jalur lebar mudah alih 3G dan 4G. Kesemua menara ini dijangka siap dan beroperasi sepenuhnya secara berperingkat bermula suku pertama 2021; dan

- b. sebanyak 31,746 pelanggan di Sarawak akan dinaiktaraf dari perkhidmatan rangkaian berasaskan tembaga kepada rangkaian gentian optik. Inisiatif yang akan dilaksanakan oleh Telekom Malaysia Berhad ini dijangka akan siap secara berperingkat menjelang akhir tahun 2021. Jumlah ini dijangka akan diselaraskan dari semasa ke semasa disebabkan oleh faktor peralihan langganan pelanggan.

4. Bagi Parlimen Muar pula, sebanyak 78 menara dan struktur pemancar komunikasi telah siap dan beroperasi sepenuhnya pada masa ini. Manakala bagi jalur lebar talian tetap, sebanyak 6,808 sambungan telah tersedia dengan sambungan sebanyak 1,028 yang sedang dalam peringkat pelaksanaan. Sebanyak 2,834 pelanggan di Muar pula akan dinaiktaraf dari perkhidmatan rangkaian berasaskan tembaga kepada rangkaian gentian optik. Inisiatif yang akan dilaksanakan oleh Telekom Malaysia Berhad ini dijangka akan siap secara berperingkat menjelang akhir tahun 2021. Jumlah ini dijangka akan diselaraskan dari semasa ke semasa disebabkan oleh faktor peralihan langganan pelanggan.

5. Susulan pengalaman Perintah Kawalan Pergerakan (PKP) yang lalu, negara menyaksikan peningkatan penggunaan internet untuk menyokong pendidikan dan perniagaan atas talian, yang secara langsung telah mendorong kepada masyarakat untuk memulakan perniagaan atas talian bagi menjana pendapatan seterusnya menjana ekonomi setempat.

6. Dengan akses kepada kesalinghubungan digital yang lebih baik, rakyat boleh mengambil bahagian dan mendapat manfaat daripada ekonomi digital yang telah menjadi salah satu daripada aspirasi Kerajaan.

7. Menyedari hakikat ini, Kementerian dan SKMM juga sedang mengadakan sesi perancangan bersama pihak industri dan pelbagai agensi Kerajaan untuk memantapkan kualiti dan liputan perkhidmatan jalur lebar.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN HAJI WAN HASSAN BIN MOHD RAMLI
[DUNGUN]**

TARIKH : 12 OGOS 2020 (RABU)

SOALAN

TUAN HAJI WAN HASSAN BIN MOHD RAMLI [DUNGUN] minta **MENTERI PERTANIAN DAN INDUSTRI MAKANAN** menyatakan pelan strategik pihak Kementerian dalam memastikan rantai bekalan makanan negara mencukupi dan terjamin semasa dunia menghadapi wabak COVID-19 dan krisis iklim.

JAWAPAN

Tuan Yang Dipertua,

Kementerian Pertanian dan Industri Makanan (MAFI) berperanan dalam memastikan rantai bekalan makanan negara mencukupi dan terjamin dalam apa jua keadaan. Dalam hal ini, Kementerian akan terus menggiatkan usaha bagi meningkatkan tahap pengeluaran makanan negara dan memantapkan rantai bekalan makanan sebagai langkah persediaan menghadapi krisis seperti wabak COVID-19 dan perubahan iklim.

Sehubungan itu, pelan strategik Kementerian adalah seperti berikut:

1. Merancang aktiviti pengeluaran makanan dengan pemberian subsidi / insentif input dan penyediaan khidmat nasihat teknikal;

2. Meningkatkan keberkesanan pengeluaran dengan menambahbaik infrastruktur dan kemudahan seperti jalan dan fasiliti ladang, pengaliran dan saliran kawasan sawah padi serta kompleks dan jeti pendaratan ikan;
3. Meningkatkan kecekapan rantai bekalan dan logistik melalui kemudahan pusat pengumpulan, penyimpanan, pemprosesan dan pengedaran;
4. Memperluas akses pasaran pengusaha tani melalui outlet pemasaran seperti pasar tani, pasar nelayan, Agrobazaar dan MyFarmOutlet serta menggalakkan penyertaan usahawan dalam platform e-dagang seperti Agrobazaar Online, NEKMATBIZ dan platform kerjasama strategik dengan pihak swasta seperti Lazada dan Shoppe;
5. Melahirkan tenaga kerja yang kompeten dan berdaya saing melalui Program Latihan Kemahiran Pertanian Kebangsaan;
6. Meremajakan sektor pertanian dengan menggalakkan penyertaan golongan muda melalui Program Agropreneur Muda dengan geran *in-kind* dan skim pembiayaan serta latihan teknikal;
7. Menggalakkan aplikasi teknologi moden seperti fertigasi, kilang tanaman, penggunaan dron, sistem pertanian pintar, *artificial intelligence* (AI), *big data* dan *internet of things* (IoT);
8. Melaksanakan aktiviti penyelidikan dan pembangunan (R&D) berkaitan input pertanian seperti benih dan baka yang mempunyai daya tahan dan kerintangan yang tinggi kepada cuaca melampau dan racun perosak.

Pelan strategik yang saya sebut sebentar tadi akan diterapkan dan diperkasakan dalam Dasar Agromakanan Negara 2.0 (DAN 2.0) (2021-2030) dan Rancangan Malaysia Kedua Belas (RMK-12) (2021-2025) yang bakal dilancarkan pada tahun 2021.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

**DARIPADA : PUAN RUBIAH BINTI HAJI WANG
[KOTA SAMARAHAN]**

TARIKH : 12 OGOS 2020 (RABU)

SOALAN

Minta **MENTERI PENGANGKUTAN** menyatakan jaminan Kerajaan supaya lapangan terbang di seluruh negara sentiasa bebas dan selamat daripada ancaman wabak COVID19.

JAWAPAN

Yang di-Pertua,

1. Untuk makluman Yang Berhormat, Bagi memastikan lapangan terbang di seluruh negara sentiasa bebas dan selamat daripada ancaman wabak COVID19, Kementerian Pengangkutan bersama-sama dengan Kementerian Kesihatan (KKM) telah menetapkan Prosedur Operasi Standard (SOP) bagi sektor pengangkutan udara di lapangan terbang.
2. Menurut SOP tersebut, semua penumpang dan kru penerbangan termasuklah kakitangan-kakitangan di lapangan terbang perlu menjalani saringan suhu badan menggunakan thermal scanner atau hand held thermometer sebelum memasuki bangunan terminal, serta di pintu perlepasan dan ketibaan bagi memastikan hanya penumpang yang sihat dibenarkan memasuki terminal dan menaiki pesawat.
3. Penumpang yang bergejala dan suhu badannya melebihi 37.5 tidak dibenarkan memasuki terminal ataupun menaiki pesawat dan perlu

mendapatkan rawatan di fasiliti kesihatan. Selain itu, pemakaian pelitup muka diwajibkan kepada semua individu yang memasuki dan tiba di terminal lapangan terbang.

4. Di samping itu, amalan penjarakan sosial dilaksanakan di kawasan umum lapangan terbang melalui tanda jarak 1 meter di lantai, meja dan kerusi kecuali di pintu pelepasan kecuali di pintu perlepasan (boarding gate) sebelum memasuki pesawat dalam terminal lapangan terbang.

5. Pihak operator lapangan terbang juga telah mengambil tindakan-tindakan yang proaktif dalam memastikan kesihatan dan keselamatan penumpang-penumpang di lapangan terbang sentiasa terjamin. Antara tindakan-tindakan yang telah diambil adalah seperti berikut:

- a. melakukan sanitasi nyahkuman dua kali sehari di fasiliti-fasiliti di lapangan terbang seperti kaunter, rel, troli, tempat duduk, self-check in counter, tempat mengambil bagasi dan lain-lain;
- b. menetapkan penjarakan sosial 1 meter di antara penumpang-penumpang di tempat duduk, kaunter daftar masuk dan kaunter-kaunter perkhidmatan kerajaan yang lain;
- c. menyediakan hand sanitizer di tempat-tempat awam di sekitar lapangan terbang tersebut seperti pintu masuk, balai pelepasan, balai ketibaan, tandas awam dan kaunter informasi; dan
- d. membuat pengumuman berkaitan dengan tatacara penjarakan sosial yang berterusan juga dilaksanakan di terminal lapangan terbang.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN MUHAMMAD BAKHTIAR
BIN WAN CHIK [BALIK PULAU]**

TARIKH : 12 OGOS 2020 (RABU)

SOALAN

YB TUAN MUHAMMAD BAKHTIAR BIN WAN CHIK [BALIK PULAU] minta **MENTERI PELANCONGAN, SENI DAN BUDAYA** menyatakan adakah Kementerian sekarang akan memberi komitmen kepada Pembangunan Seni dan Budaya Malaysia yang sedang mengalami kemelut kekurangan pelapis dan pewaris yang mampu untuk meneruskan legasi seni dan budaya Malaysia seperti Mak Yong, Mek Mulong, Dondang Sayang dan sebagainya. Jelaskan bagaimana kerajaan baru akan menjaga kebajikan adi guru, seniman, budayawan dan veteran-veteran yang telah banyak menyumbang kepada seni budaya tanah air Malaysia.

JAWAPAN

Tuan Yang di-Pertua,

1. Kementerian ini terus komited dalam pembangunan seni dan budaya Malaysia melalui pelbagai inisiatif yang dilaksanakan. Jabatan Kebudayaan Kesenian Negara (JKKN) telah melaksanakan program penyelidikan seni budaya melibatkan kerjasama antara tokoh, pihak universiti serta Badan Bukan Kerajaan dalam pelbagai bidang seni persembahan dan adat masyarakat bagi memastikan kelangsungan seni budaya tetap terpelihara. Secara tidak langsung, penyelidikan sebegini

memberi peluang kepada adiguru, seniman, budayawan dan veteran-veteran untuk menyumbang kepakaran, kemahiran dan ilmu mereka dalam mengenal pasti pelapis dan pewaris. Hasil penyelidikan yang didokumenkan pula dapat disebar luas sebagai rujukan generasi akan datang. Antara program pemuliharaan yang dilaksanakan termasuk Festival Kesenian Tradisional, Siri Teater Tradisional, Panggung Seni Tradisional dan Festival Seni Hidup. Sebagai usaha mengukuhkan lagi pemuliharaan dan pemeliharaan seni budaya, JKKN juga melaksanakan bengkel dan seminar berkaitan kesenian tradisional seperti Bengkel Pembuatan Tengkolok, Bengkel Penyelidikan Seni Budaya, Seminar Eksplorasi Mak Yong dan Kuliah Budaya.

2. Pelaksanaan program Perantisan oleh JKKN bertujuan untuk memulihara, memelihara dan mengekalkan kesenian tradisional yang hampir pupus dengan pewujudan kumpulan pelapis yang mampu menguasai segala aspek kesenian seni tradisional yang dipilih melalui perkongsian kepakaran dan pengalaman oleh tokoh dan adiguru. Program ini melibatkan sesi pembelajaran secara intensif dalam bentuk kumpulan sama ada secara bersemuka ataupun dalam talian. Pada tahun 2020, program ini dilaksanakan di sembilan (9) negeri iaitu Pulau Pinang, Pahang, Sabah, Sarawak, Kelantan, Kedah, Melaka, Terengganu dan Perak. Negeri Selangor, Johor, Perlis, Negeri Sembilan dan Wilayah Persekutuan Kuala Lumpur terlibat dalam mempromosikan kumpulan Perantisan yang masih aktif.

3. Kementerian turut memberikan penekanan dalam keperluan latihan akademik dan pembelajaran berkualiti bagi melahirkan pelapis dan pewaris berkemahiran dalam bidang seni, budaya dan warisan. Akademi Seni Budaya dan Warisan Kebangsaan (ASWARA) telah mewujudkan sebuah pusat kecemerlangan dalam kesenian tradisional yang dinamakan sebagai Pusat Seni Pentas Tradisional (PuTRA) bermula 24 Jun 2014 yang bertanggungjawab dalam membuat penelitian, penyelidikan, pengembangan kesenian tradisional Malaysia serta melatih para pelajar ASWARA dalam seni persembahan tradisional. ASWARA juga memperkenalkan kursus-kursus wajib akademik kepada setiap pelajar prasiswazah yang menjurus kepada kesenian tradisional Malaysia seperti Mak Yong, Bangsawan, Mek

Mulong, Randai dan lain-lain. Setakat ini, ASWARA telah melantik seramai empat (4) orang adiguru sebagai pakar rujuk penyelidikan serta penerbitan berdasarkan khidmat dan kepakaran dalam bidang seni dan budaya khususnya Falsafah Muzik Tradisional, Mak Yong dan Gamelan. Pelantikan tambahan adiguru turut dirancang di setiap fakulti mengikut bidang kepakaran masing-masing termasuk muzik, tari, seni halus, teater, filem, penulisan kreatif, animasi, multimedia dan warisan.

4. Sebagai usaha dalam meneruskan pembangunan seni budaya dan legasi teater tradisional, Istana Budaya (IB) mengadakan beberapa pementasan teater tradisional antaranya Mak Yong, Bangsawan, Wayang Kulit dan lain-lain. Jurulatih Artis Tari IB turut melatih Artis Budaya bagi menyediakan pelapis pada masa akan datang. Program Asuhan Seni di bawah cawangan muzik dilaksanakan bagi mewujudkan pelapis dalam muzik gamelan yang melibatkan generasi muda termasuklah pelajar dari institut pengajian tinggi awam dan swasta.

5. Kementerian ini melalui Jabatan Warisan Negara (JWN) melaksanakan program latihan daripada semasa ke semasa melibatkan golongan muda dengan menjemput pakar-pakar dalam bidang berkaitan untuk mengajar di Pusat Pengembangan Warisan JWN. Pengiktirafan penggiat seni sebagai Tokoh Warisan Kebangsaan Orang Hidup (WaKOH) di bawah Akta Warisan Kebangsaan 2005 (Akta 645) juga dilaksanakan dan sehingga kini, pihak JWN telah mengiktiraf dua puluh tujuh (27) tokoh dalam pelbagai bidang seni dan budaya termasuk bangsawan, cerita rakyat, tarian, muzik, teater, seni halus dan kraf. Tokoh-tokoh yang diiktiraf diberikan insentif termasuklah wang tunai, kemudahan perubatan percuma, sokongan dan bantuan dalam mengembangkan karya seninya melalui usaha-usaha bersama Kementerian serta menjadi pakar rujuk kepada kementerian sama ada untuk memberikan tunjuk ajar, khidmat nasihat, pemudah cara, pemakalah, suri teladan dan seumpamanya tertakluk kepada keperluan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI AHMAD NAZLAN BIN IDRIS
[JERANTUT]**

TARIKH : 12 OGOS 2020 (RABU)

SOALAN

Minta **MENTERI PERTANIAN DAN INDUSTRI MAKANAN** menyatakan keupayaan dan perancangan Kementerian menangani masalah pengeluaran makanan asas akibat daripada masalah wabak COVID-19 dan pemanasan global.

JAWAPAN

Tuan Yang Dipertua,

Status bekalan makanan asas negara (beras, sayur, ayam, telur, daging dan ikan) berada pada tahap stabil dan terkawal walaupun negara menghadapi wabak COVID-19. Bagi sesetengah makanan seperti ayam, telur dan ikan telah mencapai tahap sara diri (SSL) melebihi 90%. Selain itu, negara masih bergantung kepada import beberapa makanan seperti beras, sayur (seperti cili, kubis dan bawang) dan daging lembu bagi memenuhi keperluan dalam negara.

Kerajaan sentiasa mengutamakan sekuriti makanan negara supaya bekalan makanan asas adalah terjamin pada setiap masa. Dalam hal ini, perancangan Kementerian Pertanian dan Industri Makanan (MAFI) bagi menangani masalah pengeluaran makanan asas akibat daripada masalah wabak COVID-19 dan pemanasan global adalah seperti berikut:

SOALAN NO : 21

1. Merencanakan aktiviti pengeluaran makanan dan meningkatkan produktiviti dengan pemberian subsidi / insentif input dan penyediaan khidmat nasihat teknikal;
2. Meningkatkan keberkesanan pengeluaran dengan menambahbaik infrastruktur dan kemudahan seperti jalan dan fasiliti ladang, pengaliran dan saliran kawasan sawah padi serta kompleks dan jeti pendaratan ikan;
3. Meningkatkan kecekapan rantai bekalan dan logistik melalui kemudahan pusat pengumpulan, penyimpanan, pemprosesan dan pengedaran;
4. Memperluas akses pasaran pengusaha tani melalui outlet pemasaran seperti pasar tani, pasar nelayan, Agrobazaar dan MyFarmOutlet serta menggalakkan penyertaan usahawan dalam platform e-dagang seperti Agrobazaar Online, NEKMATBIZ dan platform kerjasama strategik dengan pihak swasta seperti Lazada dan Shopee;
5. Melahirkan tenaga kerja yang kompeten dan berdaya saing melalui Program Latihan Kemahiran Pertanian Kebangsaan;
6. Meremajakan sektor pertanian dengan menggalakkan penyertaan golongan muda melalui Program Agropreneur Muda dengan geran *in-kind* dan skim pembiayaan serta latihan teknikal;
7. Menggalakkan aplikasi teknologi moden seperti fertigasi, kilang tanaman, penggunaan dron, sistem pertanian pintar, *artificial intelligence* (AI), *big data* dan *internet of things* (IoT); dan
8. Melaksanakan aktiviti penyelidikan dan pembangunan (R&D) berkaitan input pertanian seperti benih dan baka yang mempunyai daya tahan dan kerintangan yang tinggi kepada cuaca melampau dan racun perosak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MOHD FASIAH BIN HAJI MOHD
FAKEH [SABAK BERNAM]**

TARIKH : 12 OGOS 2020 (RABU)

SOALAN

Minta **MENTERI PENGAJIAN TINGGI** menyatakan jumlah pelajar IPTA yang terdiri dari anak asnaf dan dari golongan keluarga B40 dan nyatakan langkah Kementerian bagi membantu pelajar-pelajar ini untuk mendapatkan makanan dan memenuhi keperluan harian.

JAWAPAN

Tuan Yang di-Pertua,

Sehingga 31 Disember 2019, jumlah pelajar daripada kalangan keluarga yang berpendapatan RM4,000 ke bawah di institusi pengajian tinggi awam adalah seramai 483,380 orang atau 70 peratus daripada sejumlah 690,105 pelajar di institusi pengajian tinggi awam (IPTA) termasuk Politeknik dan Kolej Komuniti.

Kementerian amat prihatin dan sentiasa berusaha untuk memastikan kebajikan dan kesejahteraan pelajar di IPT terjaga, terutamanya kepada pelajar daripada keluarga asnaf dan B40 untuk mendapatkan makanan dan memenuhi keperluan harian mereka.

Dalam konteks ini, IPTA-IPTA telah melaksanakan inisiatif untuk membantu pelajar-pelajar mereka daripada kelompok ini antaranya melalui penyediaan bantuan makanan percuma, kupon makanan, perkhidmatan *food pantry* dan sebagainya. Sumbangan makanan yang diterima daripada warga IPTA, alumni dan orang awam juga turut diagihkan kepada pelajar-pelajar yang memerlukan secara berkala atau *one-off*.

Selain itu, Kementerian dengan kerjasama Kementerian Perdagangan Dalam Negeri dan Hal Ehwal Pengguna (KPDNHEP) turut menganjurkan Program *Food Bank* Siswa Malaysia. Inisiatif *Food Bank* Siswa ini bertujuan untuk menyalurkan bantuan makanan kepada pelajar yang memerlukan dan pada masa yang sama membantu meringankan bebanan kos sara hidup yang ditanggung oleh pelajar. Program ini telah dilaksanakan di 20 buah UA dan telah memanfaatkan 12,251 pelajar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SERI ANWAR BIN IBRAHIM
[PORT DICKSON]**

TARIKH : 12 OGOS 2020 (RABU)

SOALAN

Minta **MENTERI TENAGA DAN SUMBER ASLI** menyatakan susulan dengan pengumuman Kementerian meluluskan Bantuan Prihatin Elektrik (BPE) berjumlah RM942 juta semasa Perintah Kawalan Pergerakan (PKP), apakah tindakan yang diambil terhadap Tenaga Nasional Berhad (TNB) yang mengenakan kenaikan bil elektrik secara mendadak kepada pengguna semasa PKP.

JAWAPAN

Tuan Yang di-Pertua,

Berdasarkan semakan yang dibuat oleh Suruhanjaya Tenaga, Tenaga Nasional Berhad (TNB) mengenakan caj dalam bil elektrik semasa tempoh Perintah Kawalan Pergerakan (PKP) berdasarkan penggunaan tenaga yang direkodkan melalui meter yang sah dengan mengikut kadar dan struktur tarif seperti mana yang telah ditetapkan oleh Kerajaan. Oleh itu, tiada sebarang tindakan yang diambil terhadap TNB kerana TNB mematuhi peraturan-peraturan yang berkuat kuasa.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN SYED SADDIQ BIN SYED
ABDUL RAHMAN [MUAR]**

TARIKH : 12 OGOS 2020 (RABU)

SOALAN

TUAN SYED SADDIQ BIN SYED ABDUL RAHMAN [MUAR] minta **MENTERI PEMBANGUNAN WANITA, KELUARGA DAN MASYARAKAT** menyatakan memberikan komitmen serta membentangkan rancangan untuk mengharamkan perkahwinan di bawah umur bagi memastikan eksploitasi kanak-kanak dapat dibendung.

JAWAPAN

Tuan Yang di-Pertua,

Kerajaan komited meneruskan usaha bagi menangani punca perkahwinan bawah umur melalui pelaksanaan Pelan Strategi Kebangsaan Bagi Menangani Punca Perkahwinan Bawah Umur 2020 sehingga 2025. Pelan ini mengandungi pelbagai program dan tindakan yang akan dilaksanakan sehingga ke peringkat akar umbi untuk menangani enam faktor yang telah dikenal pasti sebagai punca perkahwinan bawah umur. Program dan tindakan yang dirancang sepanjang tempoh lima tahun pelaksanaan pelan akan mencerminkan isu-isu yang merentas pelbagai sektor seperti perundangan, keibubapaan, sistem sokongan sosial, pendidikan, kesihatan dan kesedaran.

Bagi memastikan pelaksanaan Pelan ini berjalan dengan lancar maka satu Jawatankuasa Pemandu yang dipengerusikan oleh Ketua Setiausaha Kementerian ditubuhkan untuk memantau pelaksanaan pelan serta perkembangan program dan tindakan yang telah dirancang bagi setiap strategi di bawah faktor. Selain itu, Jawatankuasa ini turut berfungsi sebagai platform untuk agensi pelaksana yang terlibat melaporkan pelaksanaan, isu dan cabaran serta cadangan penambahbaikan terhadap setiap program atau tindakan yang dilaksanakan. Jawatankuasa ini juga akan berkuat kuasa dari selama lima tahun sepanjang tempoh pelaksanaan Pelan. Mesyuarat Jawatankuasa Pemandu bilangan 1 bagi tahun 2020 juga dirancang untuk diadakan pada bulan Ogos tahun ini.

Tuan Yang di-Pertua,

Kementerian juga bercadang untuk mengadakan beberapa siri konsultasi di semua negeri mengenai cadangan kenaikan had umur perkahwinan bagi lelaki dan perempuan. Kementerian juga akan meneruskan usaha untuk mengadakan perbincangan bersama UNICEF yang tertangguh disebabkan oleh Perintah Kawalan Pergerakan (PKP). Sesi libat urus juga akan diadakan dengan melibatkan kerjasama pelbagai pihak seperti Kementerian/Jabatan Kerajaan, Ahli Akademik, pakar hak asasi kanak-kanak, Pertubuhan Bukan Kerajaan (NGO), agamawan serta wakil Kerajaan negeri Sabah dan Sarawak bersama komuniti dari etnik tertentu yang masih mengamalkan perkahwinan bawah umur melalui undang-undang adat.

Kita amat berharap supaya kerjasama dari semua pihak termasuk rakan daripada pihak pembangkang, ahli akademik, NGO dapat diteruskan sebagai rakan strategik bersama Kementerian dalam mengekang perkahwinan bawah umur ini dan seterusnya merealisasikan potensi penuh kanak-kanak di negara ini.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

**DARIPADA : TUAN SANISVARA NETHAJI RAYER A/L
RAJAJI [JELUTONG]**

TARIKH : 12 OGOS 2020 (RABU)

SOALAN

Minta **MENTERI PENGANGKUTAN** menyatakan apakah langkah-langkah pencegahan yang telah diambil oleh Kerajaan sekarang di semua pintu masuk sempadan negara, lapangan-lapangan terbang dan pelabuhan untuk melakukan saringan dan pemeriksaan perubatan pada sepanjang masa mulai sekarang.

JAWAPAN

Yang di-Pertua,

1. Untuk makluman Yang Berhormat, Kerajaan mengambil serius mengenai langkah-langkah pencegahan yang diambil di semua pintu masuk sempadan negara, lapangan-lapangan terbang dan pelabuhan untuk melakukan saringan dan pemeriksaan perubatan pada sepanjang masa.

2. *Standard Operating Procedures* (SOP) di semua pintu masuk sempadan termasuk darat, lapangan terbang dan pelabuhan telah ditetapkan oleh Kementerian Kesihatan Malaysia (KKM). Mulai 24 Julai 2020, semua individu yang baru pulang dari luar negara dan memasuki Malaysia melalui Pintu Masuk Antarabangsa (PMA) akan dikenakan perintah kuarantin wajib selama empat belas (14) hari dan perlu menanggung sepenuhnya kos kuarantin di Stesen Kuarantin yang

ditetapkan oleh Kerajaan berdasarkan kepada peruntukan di bawah subseksyen 15(1) Akta Pencegahan dan Pengawalan Penyakit Berjangkit 1988. Pemeriksaan dan tapisan kesihatan di PMA akan dilakukan oleh KKM dan *Health Assessment Tool* (HAT) akan dibekalkan untuk tujuan pemantauan sendiri sepanjang tempoh kuarantin.

3. Walau bagaimanapun, Kerajaan akan menanggung kos kuarantin bagi pemegang kad Orang Kelainan Upaya (OKU) Jabatan Kebajikan Masyarakat.

4. SOP di lapangan terbang, pelabuhan dan terminal pengangkutan awam turut dicadangkan oleh Kementerian Pengangkutan dan diluluskan oleh KKM. Antara langkah-langkah pencegahan yang terkandung dalam SOP berkenaan termasuklah:

a. saringan kesihatan untuk pekerja, pengguna dan penumpang di lapangan terbang, pelabuhan dan terminal pengangkutan awam. Mereka yang bergelaja atau suhu badan melebihi 37.5°Celsius, tidak dibenarkan masuk dan perlu mendapatkan rawatan di fasiliti kesihatan;

b. memastikan penjarakan sosial sekurang-kurangnya 1 meter dipraktikkan di kaunter tiket dan menggalakkan penggunaan transaksi tanpa sentuhan seperti penggunaan mesin layan diri, *e-wallet* dan *contactless payment* (paywave); dan

c. mewajibkan pemakaian pelitup muka, menggalakkan penggunaan *hand-sanitiser* serta menggalakkan muat turun dan daftar aplikasi MySejahtera bagi pengesanan kontak rapat.

5. Untuk makluman Yang Berhormat jua, SOP MOT dan KKM telahpun dimuatnaikkan dalam laman sesawang rasmi Kementerian dan laman sesawang rasmi Majlis Keselamatan Negara untuk rujukan orang awam. Ianya juga boleh dicapai melalui aplikasi MySejahtera.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

DARIPADA : TUAN CHOW KON YEOW [TANJONG]

TARIKH : 12 OGOS 2020 (RABU)

SOALAN

Minta **MENTERI PENGANGKUTAN** menyatakan status projek naik taraf Lapangan Terbang Antarabangsa Pulau Pinang (PIA) sehingga kini. Perincikan juga perkembangan terkini cadangan pembinaan Lapangan Terbang Antarabangsa Kulim (KXP), Kedah.

JAWAPAN

Yang di-Pertua,

1. Untuk makluman Yang Berhormat, sektor pelancongan dan penerbangan adalah antara industri paling teruk terjejas susulan impak COVID-19. Ianya telah menyebabkan ketidaktentuan pasaran yang meningkatkan lagi risiko sedia ada yang membebankan industri penerbangan. Kesan penularan wabak COVID-19 terhadap ekonomi dunia dan negara, terutamanya aspek perubahan corak permintaan pelancong dan sektor penerbangan yang memerlukan satu tempoh pemulihan yang dijangka memakan masa di antara 2 hingga 3 tahun lagi.

2. Dalam hubungan ini, Kementerian Pengangkutan akan melaksanakan Kajian National Airport Strategic Plan (NASP) yang meliputi kajian semua pembangunan lapangan-lapangan terbang dan Short Take-Off Landing Airport (STOLport) dalam negara yang dijangka siap pada tahun 2023 selaras dengan Dasar Pengangkutan Negara. Kajian ini bertujuan menentukan hala tuju pembangunan lapangan-lapangan terbang di Malaysia dari segi peranannya, keperluan ruang udara (airspace requirement), kajian ekonomi dan strategik agar pembangunan sesebuah lapangan terbang itu dilaksanakan berdasarkan kepada keperluan sebenar seperti mana dapatan kajian tersebut.

3. Oleh yang demikian, sebarang cadangan pembangunan lapangan terbang baharu termasuk cadangan pembangunan dan menaik taraf Lapangan Terbang Antarabangsa Pulau Pinang dan Lapangan Terbang Antarabangsa Kulim (KXP), Kedah akan hanya dapat dipertimbangkan selepas kajian NASP dimuktamadkan oleh Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE EMPAT BELAS**

PERTANYAAN : LISAN

DARIPADA : TUAN TEH KOK LIM [TAIPING]

TARIKH : 12 OGOS 2020 (SELASA)

SOALAN

Minta **MENTERI PERTANIAN DAN INDUSTRI ASAS TANI** menyatakan tahap pencapaian pembekalan daging lembu dan kambing/bebiri tempatan untuk tahun 2017, 2018 dan 2019 dan nyatakan sasaran untuk 10 tahun yang akan datang.

JAWAPAN

Yang di-Pertua,

1. Pengeluaran daging lembu/kerbau dalam negara pada tahun 2017 ialah sebanyak 46,333.1 tan metrik. Pada tahun 2018, pengeluaran daging lembu/kerbau telah meningkat kepada 46,923 tan metrik dan kembali menyusut kepada 45,352 tan metrik pada tahun 2019.
2. Bagi pengeluaran daging kambing/bebiri ialah sebanyak 4,400 tan metrik pada tahun 2017 dan mengalami peningkatan sebanyak 4,433 tan metrik pada tahun 2018 dan menurun pada 2019 kepada 4,309 tan metrik.
3. Kadar Sara Diri (*self sufficiency level*, SSL) daging lembu/kerbau negara berada pada tahap 22.49% pada tahun 2017; 22.88% pada tahun 2018 dan 21.59% pada tahun 2019.
4. Manakala kadar SSL daging kambing/bebiri berada pada 10.23% pada tahun 2017; 10.95% pada tahun 2018 dan 10.02% pada tahun 2019.

5. Pelan Pembangunan Industri Ruminan Negara yang dibangunkan oleh MAFI Melalui Jabatan Perkhidmatan Veterinar adalah untuk meningkatkan pengeluaran dan tahap SSL daging lembu/kerbau dan kambing/bebiri. Kerajaan mensasarkan pengeluaran daging lembu/kerbau mencapai 30% SSL melalui penambahan induk kepada 878,298 ekor dengan pengeluaran sebanyak 50,000 tan metrik. Manakala daging kambing/bebiri mencapai 18% SSL dengan pengeluaran sebanyak 6,000 metrik tan menjelang 2025.

6. Perancangan untuk meningkatkan pengeluaran serta menjamin bekalan makanan negara digariskan dalam Dasar Agromakanan Negara 2.0 (DAN 2.0) yang sedang dalam penelitian akhir, bagi tujuan pembangunan industri ruminan yang mapan menjelang 2030.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' SRI BUNG MOKTAR BIN RADIN
[KINABATANGAN]**

TARIKH : 12 OGOS 2020 (RABU)

SOALAN

DATO' SRI BUNG MOKTAR BIN RADIN [KINABATANGAN] minta **MENTERI KOMUNIKASI DAN MULTIMEDIA** menyatakan apakah usaha pihak Kementerian dalam menyediakan rangkaian telekomunikasi serta capaian internet di kawasan-kawasan pedalaman yang masih belum mendapat liputan terutamanya di dalam kawasan Parlimen Kinabatangan.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian melalui Suruhanjaya Komunikasi dan Multimedia Malaysia (SKMM) telah dan sentiasa memberi tumpuan kepada penambahbaikan infrastruktur komunikasi melalui penyediaan liputan jalur lebar berkelajuan tinggi dengan menggunakan pelbagai teknologi untuk membolehkan rakyat terutama di Sabah menikmati akses kepada perkhidmatan jalur lebar berkelajuan tinggi yang lebih menyeluruh.
2. Antara inisiatif-inisiatif penyediaan perkhidmatan jalur lebar di Sabah adalah seperti berikut:

SOALAN NO : 30

- a. sebanyak 65 menara baharu yang sedang dalam peringkat pelaksanaan bagi penyediaan perkhidmatan jalur lebar mudah alih 4G. Kesemua menara ini dijangka siap dan beroperasi sepenuhnya secara berperingkat bermula suku pertama 2021; dan
 - b. sebanyak 43,879 pelanggan sedia ada di Sabah akan dinaiktaraf dari perkhidmatan rangkaian berasaskan tembaga kepada rangkaian gentian optik. Inisiatif yang akan dilaksanakan oleh Telekom Malaysia Berhad ini dijangka akan siap secara berperingkat menjelang akhir tahun 2021. Jumlah ini dijangka akan diselaraskan dari semasa ke semasa disebabkan oleh faktor peralihan langganan pelanggan.
3. Bagi Parlimen Kinabatangan pula, sebanyak tiga (3) menara komunikasi baharu akan dibina untuk penyediaan liputan jalur lebar mudah alih 3G dan 4G yang dijangka siap dan beroperasi bermula suku pertama 2021. Ini adalah tambahan kepada 141 menara dan struktur pemancar komunikasi yang telah beroperasi di Parlimen Kinabatangan. Selain itu juga, sebanyak 134 alat pemancar komunikasi di menara sedia ada di Parlimen Kinabatangan telah dinaiktaraf ke perkhidmatan jalur lebar mudah alih 4G.
4. Pihak SKMM juga melaksanakan inisiatif-inisiatif bagi penyediaan perkhidmatan jalur lebar talian tetap yang mana sebanyak 19,345 sambungan telah disediakan di Sabah. Daripada jumlah ini, sebanyak 160 sambungan telah dilaksanakan di Parlimen Kinabatangan.
5. Pada masa yang sama, Kementerian dan SKMM juga sedang mengadakan sesi perancangan bersama pihak industri dan pelbagai agensi Kerajaan untuk memantapkan kualiti dan liputan perkhidmatan jalur lebar.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : **LISAN**

DARIPADA : **TUAN HASSAN BIN ABDUL KARIM
[PASIR GUDANG]**

TARIKH : **12 OGOS 2020 (RABU)**

SOALAN

Minta **MENTERI PENGANGKUTAN** menyatakan bilakah Projek Keretapi RAPID TRANSIT SYSTEM (RTS) dari Johor Bahru ke Singapura akan dimulakan.

JAWAPAN

Yang di-Pertua,

1. Untuk makluman Yang Berhormat, mengikut kesepakatan yang dicapai pada penghujung bulan April 2020, Malaysia dan Singapura telah bersetuju melanjutkan rundingan perjanjian-perjanjian berkaitan projek Rapid Transit System Link (RTS Link) di antara Johor Bahru dan Singapura sehingga 31 Julai 2020. Sukacita dimaklumkan dalam Dewan yang mulia ini bahawa Perjanjian Bilateral, Perjanjian Konsesi dan Perjanjian Usahasama JV OpCo serta perbincangan dua hala berkaitan pembangunan projek RTS Link baru sahaja dimuktamadkan oleh Kerajaan Malaysia dan Kerajaan Singapura.
2. Untuk makluman Dewan yang mulia ini, bahawa majlis pemeteraian ketiga-tiga perjanjian antara Malaysia – Singapura telah diadakan pada 30 Julai 2020, bertempat di Tambak Johor. Ianya telah disaksikan oleh YAB Perdana Menteri Malaysia dan Perdana Menteri Singapura.

3. Untuk makluman Ahli-ahli Yang Berhormat, pembinaan RTS Link ini dijangka akan bermula sejurus selepas kelulusan-kelulusan yang sewajarnya diperolehi iaitu pada Januari 2021 dan dijangka akan mula beroperasi pada penghujung tahun 2026. Pembinaan RTS Link ini akan berjalan dalam 2 fasa iaitu dari tahun 2021 hingga hujung tahun 2024 fasa pembangunan dan pembinaan struktur sivil. Dari awal 2025 sehingga hujung tahun 2026 merupakan fasa pembinaan seperti signalling, rolling stock, telekomunikasi, pentauliahan dan pengujian sistem.

4. Dalam masa yang terdekat ini, syarikat infrastruktur RTS Link bagi pihak Malaysia yang diwakili oleh Malaysia Rapid Transit System Sdn. Bhd. (MRTS) akan memulakan kerja reka bentuk yang terperinci dan menjalankan prosedur pengambilan dan pembangunan tanah di kawasan Bukit Chagar, Johor. Penyediaan skim keretapi bagi projek RTS Link mengikut keperluan Akta Pengangkutan Awam Darat 2010 juga akan bermula di mana pemeriksaan awam bagi Skim Keretapi dan Penilaian Impak Alam Sekitar (EIA) dijangka dapat dilaksanakan pada akhir tahun ini. Pemeriksaan awam bagi EIA ini akan dijalankan selama satu (1) bulan manakala pemeriksaan awam bagi Skim Keretapi adalah selama tiga (3) bulan bagi orang ramai meneliti dan memberi maklumbalas terhadap jajaran tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : YB PUAN YEO BEE YIN [BAKRI]

TARIKH : 12 OGOS 2020 (RABU)

SOALAN

Minta **MENTERI TENAGA DAN SUMBER ASLI** menyatakan jumlah aduan diterima Suruhanjaya Tenaga berkenaan isu bil elektrik tinggi sepanjang tempoh Perintah Kawalan Pergerakan. Adakah TNB telah melanggar *Minimum Standard Level* (MSL) dalam penyediaan bil yang melebihi satu bulan dan apakah tindakan untuk setiap kes aduan.

JAWAPAN

Tuan Yang di-Pertua,

1. Suruhanjaya Tenaga telah menerima sebanyak 3,551 aduan berkaitan bil elektrik tinggi selepas Tenaga Nasional Berhad (TNB) mula membaca meter dan mengeluarkan bil dengan bacaan sebenar semasa Perintah Kawalan Pergerakan Bersyarat (PKPB), iaitu mulai 15 Mei 2020.
2. Pengeluaran bil elektrik secara anggaran ini adalah dibenarkan berdasarkan kepada Peraturan 4(4)(h), Peraturan-Peraturan Bekalan Pemegang Lesen 1990, iaitu dalam apa-apa keadaan lain yang boleh membahayakan keselamatan pemegang lesen. Dalam hal ini, pemegang lesen hendaklah mengeluarkan bil kepada pengguna berdasarkan rekod penggunaan terdahulu dan pelarasan perlu dibuat setelah bacaan meter sebenar diperolehi.

Maklumat bil anggaran boleh disemak oleh pengguna melalui Portal TNB dan juga aplikasi myTNB.

3. Pihak TNB telah mengeluarkan bil anggaran setiap bulan secara digital dan mematuhi *Minimum Standard Level* (MSL) TNB yang telah ditetapkan. Justeru itu, pihak Suruhanjaya Tenaga mendapati tiada sebarang pelanggaran terhadap Peraturan-Peraturan Bekalan Pemegang Lesen 1990 dan MSL oleh pihak TNB.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

DARIPADA : DR. AZMAN BIN ISMAIL [KUALA KEDAH]

TARIKH : 12 OGOS 2020 (RABU)

SOALAN

Minta **MENTERI PENGANGKUTAN** menyatakan perkembangan projek pembinaan terminal jeti feri baru di Pelabuhan Kuala Kedah.

JAWAPAN

Yang di-Pertua,

1. Untuk makluman Yang Berhormat, Kementerian Pengangkutan Malaysia (MOT) telah melantik Perunding Utama (*Lead Consultant* - LC) bagi projek ini pada 18 Mei 2020. Bermula bulan Jun 2020 sehingga September 2020, Perunding Utama yang dilantik adalah bertanggungjawab untuk melaksanakan kerja-kerja awalan serta penyediaan reka bentuk terperinci sebelum proses perolehan kontraktor boleh dimulakan.
2. Pihak MOT akan melaksanakan proses perolehan kontraktor secara tender terbuka bermula bulan Oktober 2020 dan dijangka selesai pada bulan Januari 2021.
3. Kerja-kerja fizikal dijangka bermula pada Januari 2021 bagi tempoh pelaksanaan selama 30 bulan dan dijangka siap pada bulan Jun 2023.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI AHMAD FAIZAL BIN
DATO' AZUMU [TAMBUN]**

TARIKH : 12 OGOS 2020 (RABU)

SOALAN

Minta **MENTERI TENAGA DAN SUMBER ASLI** menyatakan dasar *Net Energy Metering* (NEM) telah dikaji semula oleh Menteri MESSTEC pada 1 Januari 2019 di mana penggunaan teknologi ini dapat mengurangkan harga jual-beli elektrik pengguna dengan cara menjana dan menggunakan elektrik melalui solar panel. Namun, penggunaan dasar NEM ini dibahagikan mengikut kuota iaitu penggunaan domestik dan bukan domestik. Sehubungan itu, apakah hala tuju Kementerian dalam memastikan kepentingan Kerajaan Negeri terpelihara dalam pemberian kuota *Large Scale Solar* melalui kuota Negeri.

JAWAPAN

Tuan Yang di-Pertua,

1. Program *Net Energy Metering* (NEM) telah dilaksanakan sejak tahun 2016 dan terbuka kepada semua pengguna elektrik dalam kategori domestik, komersial, industri dan pertanian yang layak serta mematuhi kriteria yang telah ditetapkan. Kerajaan tidak menetapkan sebarang pengagihan kuota mengikut kategori pengguna bagi program ini. Di bawah program ini, pemilik bangunan boleh memasang sistem solar di atas bumbung dan menjana elektrik untuk kegunaan sendiri. Lebih tenaga yang dijana boleh dijual ke grid

pada kadar tarif yang setara dengan kadar tarif elektrik yang dibeli daripada syarikat utiliti.

2. Bagi pelaksanaan Program *Large Scale Solar* atau LSS, Kerajaan tidak memperuntukkan sebarang kuota khusus kepada mana-mana negeri. Sebaliknya, pemberian kuota dilaksanakan secara bidaan terbuka bagi mendapatkan harga tawaran tarif yang paling kompetitif dalam kalangan pembida. Kerajaan Negeri melalui anak syarikat boleh menyertai proses bidaan LSS sama ada secara langsung ataupun melalui penubuhan konsortium dan usahasama.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : PUAN RUSNAH BINTI ALUAI [TANGGA BATU]

TARIKH : 12 OGOS 2020 (RABU)

SOALAN

Minta **MENTERI PENGAJIAN TINGGI** menyatakan adakah Kementerian mengiktiraf pelajar-pelajar lepasan TVET kerana mereka menghadapi masalah mendapatkan jawatan di dalam GLC atau sektor awam.

JAWAPAN

Tuan Yang di-Pertua,

Kementerian sememangnya mengiktiraf graduan TVET bahkan akan memperkasakan program TVET sebagai aliran pendidikan pilihan utama pelajar. Program-program TVET yang ditawarkan di Politeknik dan Kolej Komuniti telah mendapat akreditasi daripada badan akreditasi seperti Agensi Kelayakan Malaysia (MQA); dan badan akreditasi dan profesional yang lain seperti Majlis Akreditasi Kejuruteraan Teknologi (ETAC) di bawah Lembaga Jurutera Malaysia, *Malaysian Board of Technologist* (MBOT), Lembaga Juruukur Tanah (LJT), Lembaga Arkitek Malaysia (LAM), *International Maritime Organisation* (IMO), *Asia Pacific Accreditation and Certification Commission* (APACC) dan sebagainya. Agensi-agensi ini telah menetapkan standard piawaian akreditasi bagi program dan institusi TVET yang perlu dicapai dalam memastikan kualiti graduan yang dihasilkan berada pada tahap yang tinggi.

Sebagai usaha untuk memastikan kualiti graduan TVET berada di tahap yang tinggi serta diterima oleh industri, Kementerian sentiasa bekerjasama dengan pihak industri dalam memperkasakan TVET terutamanya dari sudut pembangunan kurikulum supaya dapat memenuhi kehendak industri. Antara kerjasama yang dilaksanakan, adalah melalui penubuhan Majlis Penasihat Industri yang berperanan memberi pandangan dan berkongsi maklumat berkenaan fokus semasa industri di peringkat nasional dan global. Pandangan dan perkongsian tersebut membantu Kementerian merancang pelan tindakan bagi memastikan kurikulum TVET yang digunakan adalah terkini dan selaras dengan keperluan semasa industri.

Untuk makluman Ahli Yang Berhormat, trend kebolehpasaran bagi graduan Politeknik dan Kolej Komuniti menunjukkan pencapaian melebihi 95 peratus bagi tempoh 3 tahun berturut-turut sejak tahun 2017. Ini menunjukkan graduan TVET mempunyai daya saing yang tinggi dalam pasaran pekerjaan. Kementerian melalui Jabatan Pendidikan Politeknik dan Kolej Komuniti (JPPKK) sentiasa memastikan kualiti pelajar lepasan TVET menjangkau tahap standard yang ditetapkan. Sekian, terima kasih.